

Creschientscha, bainstar e stabilitad per il Grischun

Finamiras che la Banca Chantunala Grischuna ha cuntanschì 2016

■ (anr/gc) Sonda passada èn na main che 2300 partizunaris e partizunarias da la Banca Chantunala Grischuna (BCG) sa rendids da bellezza aura en la Halla da la citad a Cuira per assister a lur 32. cumin. Els èn vegnids beneventads cun grond plaschair dal president da la BCG Peter Fanconi. Onn per onn va in terz dals participants e da las participantas a quest imposant inscunter. Uschia hajan fin 3000 giasts la pussaivladad da vesair lur banca ina giada pli da manivel ed i saja ina chaschun per la BCG d'engraziar tant als clients sco als investurs. Duas cifras vegnan mintgamai communitgadas baud e spegadas fitg. Purtaders da scrits da participaziun hajan survegnì ina dividenda nunmidada da 38 francs ed il chantun 95 milliuns. Quai tedlan ins gugent, era perquai che tuts preschents profitechan.

Preparà la dretga strategia

L'onn passà saja vegnì preparà il terren strategic impurtant per l'avegnir – segund il president da la banca. Ins haja numnadamain tschentà il fundament per ina ulteriura diversificaziun dals retgavs. La reorganisaziun da la participaziun a la Banca Privata Bellerive SA e l'acquist d'ina cumpart da 25% da l'Albin Kistler SA hajan gidà latiers. Cun lantschar in agen fond d'accias Svizra sco era in fond d'obligaziuns en francs svizzers ed euros vegnian rinforzads il posiziunament e la percepziun da la BCG sco banca d'investiziuns.

Creà plivalurs

La BCG cun pli che 1000 collavuraturas e collavuraturats saja ina gronda patruna che scoleschia er 80% da quels. 65% da las persunas privatas en il Grischun èn



La Halla a Cuira è fullanada.

FOTOS MAD



Il president Peter Fanconi.

clientas da la BCG e per 50% da las interpresas en noss chantun è ella la banca principala. Quai sajan autas cifras. Era contribuì ha la BCG a pli che 11% da las entradas fiscalas dal chantun. Quintà enturn dat ella al chantun 450 francs per abitant. Sia devisa sa clomia: Guardar enavant e nizzegiar las schanzas. La BCG disponia dad in'aura cumpetenza per deposits. Ins saja adina a la tschertga da schliaziuns modernas era cun posiziunar la banca digitala e porscher cussegliaziun. Las sfidas, era per la BCG, sajan: Regulaziun, tschains e concorrenza. Tar il rating e distincziun è la BCG sa plazada sin il rang quatter da 91 bancas e sco meglra patruna insumma.

In gudogn stabil

Cun 168,5 milliuns po il concern da la banca preschentar in resultat stabil – segund il CEO da la BCG Alois Vinzens. Tar ils indicaturs (cifras caracteristicas) saja il final bun ed il resultat operativ legraivel. Il medem valia era per il gudogn dal concern. Qua tras vegnian creschientscha, bainstar e stabilitad per il Grischun e ses abitants generads.

La BCG haja impundì 3,2 milliuns per sponsoring en il Grischun (projects socials, art e sport). La productivlad è nunmidadamain ferma. Sulet ils tschains sajan ina grevizza negativa. Enavos gjaja er il retgav per cumissiuns. Il resultat da ristgs è percenter bun e l'agen chapital

cun 2,45 milliardas considerabel. Era per quest onn quintan ins cun in gudogn da 166–170 milliuns.

Bel program accompagnant

Sper intervegnir cifras e resultats da la BCG tras ils responsabels per l'onn passà sa legran participants e participantas era dal bun gentar e surtut dal divertiment musical. Quel è vegnì procurà quest onn per plaschair da tuts da Christoph Walter e ses orchester da marsch cun 40 persunas sco era dals famus Tamburs da Domat. L'entir inscunter è stà – sco adina – ina occurrenza organisada perfezgamain en tuts detagls.